

23 MAR 1998

Agong-Rasmi

AGONG RASMI PEMBUKAAN MAJLIS PARLIMEN KESEMBILAN DENGAN PENUH ISTIADAT

KUALA LUMPUR, 23 March (Bernama) -- Yang di-Pertuan Agong Tuanku Ja'afar hari ini merasmikan persidangan penggal keempat majlis Parlimen kesembilan dalam upacara penuh istiadat di bangunan Parlimen di sini.

Keberangkatan tiba Seri Paduka yang diiringi Raja Permaisuri Agong Tuanku Najihah di Dataran Parlimen disambut oleh Perdana Menteri Datuk Seri Dr Mahathir Mohamad dan Datin Seri Dr Siti Hasmah Mohamad Ali serta Timbalan Perdana Menteri Datuk Seri Anwar Ibrahim dan Datin Seri Dr Wan Azizah Wan Ismail.

Setelah Seri Paduka berdua naik ke pentas diraja, kawalan kehormatan yang terdiri daripada 103 pegawai dan anggota Batalion Pertama Rejimen Askar Melayu Diraja dari Kem Sungai Buloh yang diketuai oleh Mejar Romainor Mohamed menyembahkan "Hormat Diraja".

Lagu kebangsaan "Negaraku" dimainkan oleh 60 anggota pasukan Pancaragam dari Kor Armor Diraja Port Dickson yang dipimpin oleh Kpt Jaafar Yusof dan ini disusuli oleh tembakan meriam 21 das.

Tuanku Ja'afar kemudian turun dari pentas diraja dan memeriksa kawalan kehormatan. "Hormat Diraja" dipersembahkan untuk kali kedua sebelum lagu "Negaraku" dimainkan sekali lagi.

Selesai acara di Dataran Parlimen, Seri Paduka berdua berangkat masuk ke bilik rehat diraja secara acara seterusnya dilangsungkan dalam dewan persidangan.

Tuanku Ja'afar kemudian menyampaikan titah ucapan bagi merasmikan pembukaan persidangan bagi kedua-dua dewan -- Dewan Rakyat dan Dewan Negara -- secara serentak.

Selain anggota Dewan Rakyat dan Dewan Negara, majlis itu turut dihadiri menteri-menteri besar dan pegawai kanan kerajaan. Turut hadir ialah ketua-ketua perwakilan asing di negara ini. -- BERNAMA

AKT NMO